

# PAULO ENA URIURI KOLOSI ENADI

---

**1** <sup>1</sup>Paulo Iesu Keriso ena Aposotolo, Eaubada ena nuatu debana eai, maegu eda tau Timoteo,

<sup>2</sup>Hetabu tataodi, eo eda tataoyao taumiatahitahi Keriso boeana eai, Kolosi eai: Ainauia enamiu, eo nuataru hinage, Eaubada Tamada arinai i laoma, eo eda Guiau Iesu Keriso.

<sup>3</sup>Eaubada, eda Guiau Iesu Keriso Tamana, ai lautoiei, enamiu ai laulau-uura huia gamagamagari, <sup>4</sup>paana emi sunuma Keriso Iesu boeana eai wasana ai ataiei, eo emi gadosisi hetabu tataodi gamagaridi aridi eai.

<sup>5</sup>Sunuma wa enamiu se torenonohaiyao galewa eai, iaede nabada wa ribamamohoina ribana eai au ataiei, evanelia eai; <sup>6</sup>i lagema arimiu eai, doha hinage ie lage tanoubu tupo gamagari, eo aiaina ie tore, doha hinage arimiu eai, asubenana eai wa au ataieibagunaei, i laoma e huia ta, Eaubada ena ainauia au hearo mamohoiei, <sup>7</sup>doha heleda-taupaisoa lolona Epapara i heatamiu wa, ia Keriso ena heaheari taunuaadidirina esau, ai debamai eai, hinage <sup>8</sup>emi gadosisi Earua boeana eai, ia tauheribamai ede.

<sup>9</sup>Paana ede nei asubenana eai wa wasana ai ataiei, i laoma e huia ta, nige ai uura lautom enamiu, ai henua ariri bena Eaubada ena nuatu italobaina eai au monau, sonoga gamagari eai, eo sibasiba earua ena tupo eai. <sup>10</sup>Bena au laulau doha mamohoi omi Guiau enanayao, tatao au henualolodi, hari paisoa hari paisoa lolo aridi eai, eo aiaimiu au tore, Eaubada nuanuatuna au hemotula. <sup>11</sup>Adidiri gamagamagari eai se headidirimiu, ena gigibori namanamarina eai, nuamiu se paipai, au taubiga-daoi, makodemiu; <sup>12</sup>Tamana arinai au aiaitoi, ia ede i hetoroda, hetabu-tataodi marana boeana eai edi gogo lailai, ita enada tupona ta abi. <sup>13</sup>Ia masigiri gigiborina eai i girihaida, i torelaeda Natu-eogoeogoina ena basileia eai, <sup>14</sup>ia debana eai se hemauida wa, osinana eai, baea ribagagirina ede.

<sup>15</sup>Eaubada ana ao nige tautitana, ia tautauna ede, ginauri maumauridi gamagaridi ealahouna; <sup>16</sup>paana ia nimana eai ginauri gamagaridi se

hetubudi, galewa eai e tanoubu eai, matada eai ta itaitaidi e matada eai nige ta itaitaidi, hari terona, e hari basileia, e hari tanuaga, e hari gigibori: ginauri gamagaridi ia tauhetubudi, eo se hetubudi ia enana. <sup>17</sup>Eo ia ginauri gamagaridi i bagubagunaedi, eo ia debana eai ginauri gamagaridi se laulau. <sup>18</sup>Ia uruna ede, ekalesia tauna ede; ia ealahouna, mate eai tautorouio-baguna; bena ginauri gamagamagaridi aridi eai ia i toro baguna. <sup>19</sup>Paana Tamana ena nualolo bena abihemonau maudoina ia arinai i ota. <sup>20</sup>Ia enada i laubiri, ena satauro osinana eai, ia debana eai ginauri gamagaridi i helabiniedi; ena tanoubu eai ginaurina, e galewa eai.

<sup>21</sup>Na omi, nabada wa au tausudara, nuamiu eai omi waiunu, emi paipaisoa baaea debadi eai, <sup>22</sup>huia ta i helabiniemiu, ia tauna bulumana eai, ena mate debana eai, bena i hetoromiu omi tabuna, nige edi abahegurumiu, e edi abaribasuumiu ia matana eai: <sup>23</sup>ena au heesegaimiu, sunuma eai ta au laulau, emi paa adiadirina arinai au toro-tahitahi, evanelia sunumana arinai taba nige se oihsuaramiu, iaede au ataieyao eo tatao gamagaridi galewa ubuna eai se guguiaidio, arinai eau Paulo se heterogu ena heaheari eai ea lau.

<sup>24</sup>Amamna ea hearodi omi debamiu eai, se hekodeaririegu, eo Keriso ena amamna tupona ea abi eau bulumagu eai, ia tauna debana eai, iaede ekalesia. <sup>25</sup>Arinai ede se heterogu eau tauheaheari, Eaubada i tauribaegu ena nuatu i leama omi debamiu eai, bena Eaubada ena riba ea hemamohoiei; <sup>26</sup>riba eamuyamui wa mumuga ariri eai, hari huia hari isi eai, se toreyamui i laoma e huia ta se hemasarahayao ia ena hetabu-tataodi aridi eai. <sup>27</sup>Isi aridi eai gogo lailaina, namanamarina, ginauri eamuyamuina wa enana, Eaubada bena i hemasarahana, bena i soe Murimuri-tataodi aridi eai; iaede Keriso boeamiu eai, galewa namanamarina ta sunusunumaei wa. <sup>28</sup>Ia ai guguiaei, hari tau eo hari tau ai ribahesanapuei, hari tau eo hari tau ai heata, sonoga gamagamagari eai; bena hari tau eo hari tau ai woeai e i lolodumaduma, Keriso Iesu boeana eai. <sup>29</sup>Arinai hinage ea paisoa, ea heasaasa, ia ana paisoa debana eai, iaede boeagu eai i paipaisoa ma-gigiborina.

**2** <sup>1</sup>Ea 'ne bena abina au ata, eau nuagu i hisihisili ariri omi debamiu eai, eo isi Laodikea eai hinage, eo isi headi, gamagaridi sora nige agu ao bulumagu eai ta se ita. <sup>2</sup>Bena nuadi se biga, bena gadosisi eai nuadi se ino-esegaidi, eo gogo saesaena eai wa, nuatu adidiri eo italobai se monau, bena Eaubada nuatuyamuyamuina abo abina se ata, iaede Keriso, <sup>3</sup>sonoga gogona maisa-lailaina maudoina ia arinai se toreamuiyao. <sup>4</sup>Teina ta ea ribaei, ata tau esau riba amna aridi eai i boraimiu. <sup>5</sup>Paana bulumagu eai ata bena ea miasuaraemiu, taiede earuagu eai eau maemiu, ea kode emi mia-komakomani ea ita, eo emi sunuma Keriso arinai i otaesegai.

<sup>6</sup>Doha Keriso Iesu Guiau aue abi nuamiu eai, au laulau hinage ia boeana eai; <sup>7</sup>Iammiu ia arinai au tore, ia boeana eai se abi-hetoromiu, sunuma eai au torotahitahi doha hinage se heatamiu, arinai emi lautoi au helai.

<sup>8</sup>Au komani ata tau esau i boraimiu tanoubu ta ena sonoga eai, eo ena nuasaesae gaibu eai, doha tatao beabeadi edi laulau, doha tanoubu ta kamanina, na nige doha Keriso enana. <sup>9</sup>Paana Eaubada ana ao maudoina i mia-hemonau, ia wa tauna eai. <sup>10</sup>Omi hinage au monau, ia boeana eai, ia gigibori maudoina, eo tanutanuaga, uruurudi ede. <sup>11</sup>Ia boeana eai omi hinage peritome aue abi, peritome wa nige nima eai se ginauri, tauna bulumana emi aba-torehesuarana ede Keriso ena peritome eai: <sup>12</sup>emi bapatiso eai ia maemiu se puruhimiu, arinai hinage ia maemiu au torouio, paana Eaubada ena paipaiso au sunumaei, arinai Iesu mate eai wa i hetoro. <sup>13</sup>Omi emi baeae boeadi eai aue mate, eo bulumamiu wa nige se heperitome, ia maemiu i hemauresegaimiu, emi baeae gamagamagari i nuatugabaedio. <sup>14</sup>Laugagaeo nima eai se uri arinai se hegiruda wa, i saugabaei, i lau baeaida wa na i laehesuara, satauro eai i poasihepatulaei. <sup>15</sup>Arinai basileia eo gigiboridi i hetatagorigoridi, i hemasaraha-auridi, eo i saepoidi.

<sup>16</sup>Arinai tabu tau esau i hegirumiu ena buluma au aidi, e emi nomnom eai, e huia tabudi heasisina eai, e nawalai ena huia poe, e sabati asubenadi. <sup>17</sup>Meta tautau mo, ginauri sora nige se tubu heaheasonidi, na ginauri mamohoina wa Keriso enana. <sup>18</sup>Tabu tau esau i boraimiu emi ainauia i girihai, iabom ena nuatu eai bena nuatu-dobidobi gaibu e aneru tabaohuna i heatamiu, ginauri nige abina i ata arinai i hemodeuioi, ia ena nuatu buluma mo, i nuasaesae, <sup>19</sup>na Uru wa nige i abididini; uruna iaede tauna maudoina tauheaina, popona eo wonowonogarana i ino-esegaidi, arinai tauna wa ie tubu, ena tubu wa Eaubada i mosei.

<sup>20</sup>Ena omi tanoubu laulaudi aridi eai aue mate, Keriso maemiu, paana saha doha tanoubu eai ma-miamiu aiudi udoi udoi au awaabiedi?

<sup>21</sup>(Tabu u abi-ita, Tabu u ai-ita, Tabu u abilau; <sup>22</sup>ginauri gamagaridi ta ta hepaisoaei na se tatagorigori.) Tatao mo edi lauheata eo edi laugagaeo ina. <sup>23</sup>Teina ginauridi ta adi ao doha sonoga, itabom eda nuatu tabaohuna eo nuatu-dobidobiuiuio, eo tauda ta healapaipai; ia-mo nige gonoana se saguida buluma lelehina arinai.

**3** <sup>1</sup>Ena omi Keriso maemiu au torouio, dimo ewana eai ginauridi au eooidi, Keriso ena aba-babawa eai, Eaubada nima-tutuna eai.

<sup>2</sup>Emi gadosisi au toresegai ewana ginauridi aridi-ena, nige tanoubu ta ginauridi aridi-ena. <sup>3</sup>Paana omi au mateo, emi mauri Keriso arinai se toreyamui, Eaubada boeana eai. <sup>4</sup>Keriso, ia eda mauri ede, sora ena huia taumasaraha eai, omi hinage maemiu abo au taumasaraha, ia namanamarina eai.

<sup>5</sup>Arinai eaumi tanoubu eai ta au hematedi: isi ede ganaganawari, laulau bii, buluma lelehina, gadosisi baaea, gogo gadosisina iaede doha oitau tabaohuna. <sup>6</sup>Wau ginauri wa debadi eai Eaubada ena ouyalayala abo i taru awayagara nanatunayao potadi eai; <sup>7</sup>beabeana omi hinage dobila eai ta au laulau, huia ne ginauri ta boeadi eai au miamia. <sup>8</sup>Na huia ta ginauri gamagaridi ta omi au torehesuaradi; nuabaaea, ouyalayala, nuakalapi, diladila, riba-hetaumaeamaea awamiu eai au ala-gabaei. <sup>9</sup>Tabu esau, esau i borai, paana tau beabeana wa au torehesuarayao, eo ena laulau hinage, <sup>10</sup>eo tau harihariuna au luyao, huia gamagari italobai harihariu arinai se heharihariu, ia tauhetubuna wa ana ao i abiwatai. <sup>11</sup>Teinai nige Heleni e Iudea, peritome e nige-peritome, etene e Sikaito tauna, tau-auau, e tauiaiayiri, na Keriso mo ginauri maudoina ede, eo ginauri gamagaridi boeadi eai.

<sup>12</sup>Besi ginauri ta au luidi, doha omi Eaubada ena hinhineri tataomiu, se hetabuemi, se gadosisi-aririemi, iaede nuatoatoa nuamiu eai, abilolo, nuatudobidobiui, manabiga, taubiga-daoi. <sup>13</sup>Esau, esau ena huia au mosei, eo au haiheduduraiuioimiu, ena esau biribiri i hetoro ena doga arinai; doha Guiau emi baaea i nuatu-gabaedio, omi hinage au abi doha nei. <sup>14</sup>Teina mo i baguna, gadosisi au lui, ginauri gamagaridi i au esegaidi ede, se lau lolo-esega. <sup>15</sup>Eaubada ena loni nuamiu bena i tanugaedi, emi dobila ina, arinai se eogaimiu omi taumi esega; eo nuamiu eai au lautoi. <sup>16</sup>Keriso ena riba boeamiu eai bena i miahelai, ma sonogana maudoina, au hai-heatauiomiu, au lauhasahasauioimiu, salamo eai, eo wana tabudi eai, eo wana earua enana, au wanawana, ena ainuia nuamiu eai, Guiau arinai. <sup>17</sup>Eo saha eo saha au abi, emi riba eai e emi laulau eai, ginauri gamagaridi Guiau Iesu esana eai au ginauridi, ia debana eai Eaubada, Tamana, au laulautoiei.

<sup>18</sup>Sisine-tawasora, monemiuyao au awaabiedi, doha i lolo ede, Guiau boeana eai. <sup>19</sup>Tatao-tawasora, monemiuyao au gadosisiedi, tabu au siosiololo aridi eai. <sup>20</sup>Merumeru, ginauri gamagaridi eai tamamiuyao eo sinamiuyao au awaabiedi, paana teina Guiau nuana i helolo aririei. <sup>21</sup>Mai-tama, tabu nanatumiuyao au hesohesomdi, ata nuadi se beruberu. <sup>22</sup>Tauheaheri, ginauri gamagaridi aridi eai tanuagamiuyao tanoubu eai ta au awaabiedi; nige matadi eai mo au paisoa, doha tatao mo nuadi au helolodi, na ma-nuaesegamiu, doha Eaubada au matausiei. <sup>23</sup>Saha eo saha au ginauri, ma nuamiu au ginauri, doha Guiau enana au ginauri, tatao nige'e, <sup>24</sup>au nuatui, Guiau nimana eai ena gogo tupona, maisa saesaena, abo au abi: paana omi Guiau Keriso au heaeaiei. <sup>25</sup>Ia baaea tauginaurina, baaea wa maisana abo i abi, hinage tatao taba nige se heasisiedi:

**4** <sup>1</sup>Tanutanuaga e, emi tauheaheri enadi au mose-dudurai, eo gonogonoadi; au nuatui omi hinage Tanuagamiu galewa eai.

<sup>2</sup>Uura eai au tauesegaimiu, hinage au silasilawahetete, malautoimiu.

<sup>3</sup>Enamai hinage au laulau-uura, bena Eaubada ema dobila i soe abo ai

ribariba, Keriso ena riba-eamuyamui ai ribahemasaraha, iaede debana eai se augu ta, <sup>4</sup>egu riba bena se masaraha, doha i lolo ea riba.

<sup>5</sup>Au laulau komakomani ganamuri matadi eai, tabu emi huia au gabaei.

<sup>6</sup>Emi riba huia gamagamagari ma-ainauiana, au hearita, abo tau esa, tau esa ena riba abina au ata au heuio komakomani.

<sup>7</sup>Wasagu gamagari Tukiko abo i heribamui, ia egu tau lolona, tauheaheari i torotahitahi, eo helegu-taupaisoa lolona Guiau boeana eai.

<sup>8</sup>Hesabana ede ina ea hetamariawa, bena wasamui i ataiei eo nuamui i helolodi; <sup>9</sup>ia maena Onesimo, eda tau lolona esau, ta gadosisie, eo omi emi doge esau. Isi ema laulau gamagamagari abo se heribamui.

<sup>10</sup>Arisitako, helegu-tauauau-tauna esau, i lautoiemui, eo Mareko, Banaba madiana wa (emi abiabina se heribamui— ena i laowa ia bena au oiyami), <sup>11</sup>eo Iesu, esana esau ede lusetasi. Helegu-taupaisoa Eaubada ena basileia enana, boeadi eai ina tatao ta isibom tau-peritome, isi tauhenuabigagu ede. <sup>12</sup>Epapara, omi enamui esau wa, eo Keriso ena heaheari, i lautoiemui. Huia gamagari uura eai enamui i paisoa adidiri, bena au toro, bena au lolo, eo nuamui se adidiri Eaubada ena nuatu au abiheohi. <sup>13</sup>Ia ea itayao arinai ea ribaei ina, omi arimui eai i nuahai ariri, eo isi hinage Laodikea eai, eo Hierapoli eai. <sup>14</sup>Luka, doketa se gadosisie wa, eo Dema, se lautoiemui. <sup>15</sup>Eda tataoyao Laodikea eai ai lautoiedi, eo sine Numepa, eo ekalesia ia ena numa eai se oioigogo. <sup>16</sup>Ina leta ta se hasiriyao boeamui eai abo au hetamari bena ekalesia Laodikea eai se hasiri hinage, eo isi edi leta omi hinage abo au hasiri. <sup>17</sup>Hinage Arekipa au heriba au ene, “Paisoa Guiau arinai ue abi wa, u komani abo u ginauri heohi.”

<sup>18</sup>Eau Paulo, egu lautoi ina, eaubogu nimagu eai. Egu auau ta au nuanuatuidi. Ainuia enamui. Amen.<sup>a</sup>

---

**a 4.18** Roma eai se uri, Kolosi tataodi aridi eai, Tukiko eo Onesimo nimadi eai.